

Kako je internetska stranica postala svjetski komšiluk

Dovla.net posjećuju i Sarajlije s Kanarskih otoka

Više od 25.000 posjeta u nekoliko mjeseci • Kreator Ladislav Vlado Kaluža
• Kako je Damir Lisac nasamario Paljane na proslavi Nove godine

Komšiluk je u srcu i ne mjeri se daljinom, napisao je jedan od posjetilaca web-stranice dovla.net, koju možemo nazvati elektronskom dimenzijom Sarajeva koja, kao i grad, živi svojim životom punim anegdota, tužnih i srčnih sjećanja, slika iz djetinjstva, puna duha...

Fotoreporter Caki

Dovla.net je internetska stranica koju posjećuju Bosanci i Hercegovci, uglavnom Sarajlije rasute po cijelom svijetu. Tu navode svoje nove i stare priče, spajaju pokidane veze, informiraju se o



Kaluža i Lisac: Nove godine na Jahorini

gradu i njegovim stanovnicima, objavljuju neke stare fotografije, poput voza „čire“, ljetovanja u „Ferijali“, rukometne i košarkaške ekipe Bosne, druženja...

Kreator web-stranice je Sarajlija Ladislav Vlado Kaluža, možda najviše poznat po tome što je deset godina bio košarkaški sudija u prvoj ligi bivše države. Od 1994. godine sa suprugom Suardom živi u Arizoni.

- Kada smo došli u SAD, telefonirao sam, slao pisma, bilo je to uporno traženje prijatelja. Onda sam 2005. godine napravio web-stranicu na koju sam samo postavljao neke fotografije. U septembru sam otišao u penziju i počeo uz slike pisati o Sarajevu. Ubrzo su i drugi počeli pisati, slati foto-



Košarkaška ekipa Mlada Bosna: Drugi slijeva čuči Davorin Popović, a peti Boša Tanjević

grafije, razmjenjivati informacije - govori Kaluža.

U samo nekoliko mjeseci stranica je postala hit među Sarajlijama, i to ne samo u inozemstvu nego i u gradu. Posjećena je više od 25.000 puta iz više od 30 zemalja, među kojima čak i iz Brazila, s Tajlanda, Kanarskih otoka...

- Prvi komentari bili su „ne-moj odustajati“. I neću, jer meni, ali i drugima pričinjava veliko zadovoljstvo. Sada sam se malo dozirao, u početku sam pisao po dva-tri članka dnevno, nisam mo-

Kako je Delibašić pozajmio novac Bosni

- Mirza je za prelazak od Bosne dobio izvjesnu sumu novca koju je nekoliko mjeseci kasnije, kada je trebalo dovesti Pešića u klub, pozajmio klubu i onda čekao da mu vrate u ratama. Nikada nije tražio koliko je mogao, uvijek sam govorio kako bi nam neko drugi uzeo dušu - prepričava Kaluža, koji je bio veliki prijatelj Mirze Delibašića i Davorina Popovića, anegdota koju je postavio i na internet.



„Čiro“ kroz Bistrik

gao spavati... Glavni „fotoreporter“ u Sarajevu mi je Mladen Cakeljčić Caki, koji slika rajnu po gradu i šalje na web-stranicu, pa se sve ekspresno širi svijetom - priča Kaluža.

Ulaznice za igranke

Kako to obično biva u Sarajevu, u lokalu gdje razgovaramo s Kalužom, koji trenutno boravi u gradu, nalazi se i njegov stari prijatelj, poznati ugostitelj Damir Lisac. Zajedno su pjevali u horu u „Slozi“ da bi dobili besplatne ulaznice za igranke. Pridružuje nam se i počinju prisjećanja, anegdote, „mahalanja“ ko je gdje, šta radi...

Kaluža je nekada često slavio nove godine u hotelu „Jahorina“, gdje je upravo Lisac puštao muziku. Svirali bi „Indeksi“, bila sva raja, a onda bi, dodaje Lisac, došli Paljani željni tuče.

- A ja na mikrofon kažem: „Nemojte se, moji prijatelji, bojati, neće biti nikakvih problema dok su tu naši Paljani.“ A onda se oni zbune i mašu. Onda im kažem: „Samo vi pratite da ne bude nešto“, a oni gledaju kao tjelohranitelji i nemaju pojma... - priča Lisac.

Z. PERŠIĆ

Kuća u Sarajevu vrijedna 100 košta 300 dukata

Na dovla.netu jedan posjetilac je prepričao zanimljivu angdota o profesoru Najthartu koji je na jednom času o staroj gradskoj arhitekturi na Kovčima, kazao:

- Vlasnik nudi svoju kuću začuđenom kupcu, ali mu cijena

izgleda previsoka, pa mu vlasnik objašnjava zašto toliko košta. Kaže da kuća koju je ponudio za 300 zapravo vrijedi samo 100 dukata, ali da komšija s desne strane vrijedi još 100 te komšija s lijeve strane još 100.